

BOSNA I HERCEGOVINA  
FEDERACIJA BOSNE I HERCEGOVINE  
PARLAMENT FEDERACIJE  
DOM NARODA  
Broj: 02-02-954/08  
Sarajevo, 17.10.2008. godine

## Z A P I S N I K

### 16. SJEDNICE DOMA NARODA PARLAMENTA FEDERACIJE BOSNE I HERCEGOVINE, održane 09. i 17. oktobra 2008. godine

Sjednica je počela u 10.34.

Sjednici je predsjedavao Stjepan Krešić, predsjedavajući Doma naroda Parlamenta Federacije BiH.

Na početku sjednice predsjedavajući je pozdravio: delegate, potpredsjednicu Federacije Spomenku Mičić, premijera Vlade Federacije BiH Nedžada Brankovića, ministre u Vladi Federacije BiH, predstavnike udruženja, međunarodnih organizacija, goste i predstavnike akreditiranih medijskih kuća koji prate rad sjednice.

Izostanak sa sjednice opravdali su Jasenko Tufekčić, Vanja Broćeta i Svetozar Pudarić.

Na osnovu evidencije Stručne službe, predsjedavajući je konstatovao da sjednici prisustvuje 41 delegat, što čini većinu, te Dom naroda može raditi i punovažno odlučivati.

Prije prelaska na rad delegati su, bez primjedbi, jednoglasno usvojili Zapisnik 14. sjednice, održane 03. i 17. jula. 2008. godine i Zapisnik 15. sjednice Doma naroda Parlamenta Federacije BiH, održane 17. jula 2008. godine.

Nakon toga predsjedavajući je podsjetio delegate da, na osnovu člana 104. Poslovnika o radu Doma naroda, mogu postavljati delegatska pitanja, pokretati inicijative ili izraziti nezadovoljstvo dobijenim odgovorima.

#### **Delegatska pitanja i inicijative**

**Besim Spahić** je izrazio nezadovoljstvo dobijenim odgovorom na pitanje u vezi sa raspodjelom sredstava za podršku projektima i programima koji će se finansirati u Federaciji BiH za 2008. godinu, te je upitao koji su stvarni kriteriji koji su se koristili pri raspodjeli ovih sredstava, koji su konkretni projekti dobili ta sredstva i u kojoj su fazi realizacije.

Tom prilikom je zatražio da se u transkriptu 14. sjednice Doma naroda Parlamenta Federacije BiH izvrši korekcija, tako da umjesto riječi: "multinacionalna arena" pišu riječi: "multifunkcionalna arena".

**Miro Lazović** je izrazio nezadovoljstvo dobijenim odgovorom u vezi sa statusom prostorija nad kojima SDU ima pravo raspolaganja, te je pokrenuo pitanje da se neovlaštena lica izbace iz tih prostorija i omogući nesmetan rad.

Premijer Nedžad Branković je odgovorio da će Služba za zajedničke poslove Federacije BiH čim dobije pravomoćno rješenje u vezi sa pravnim sljedništvom ugovorne strane u zakupnom odnosu iseliti nelegalnog korisnika.

**Mladen Lonić** je izrazio nezadovoljstvo dobijenim odgovorom na pitanje koje se tiče elektrifikacije povratničkih područja u Unsko-sanskom kantonu.

Premijer je zamolio da se putem općine dostavi inicijativa federalnom ministru raseljenih lica i izbjeglica Edinu Mušiću kako bi se riješio ovaj problem.

**Tomo Vidović** je zahvalio Federalnom ministarstvu pravde i Federalnom ministarstvu prometa i komunikacija na dobijenim odgovorima, ali je ukazao na nedostatke u odgovorima, a koji se tiču kriterija i obima sanacija stanja magistralnih cesta u Federaciji.

Takođe je zatražio da se ubrzaju aktivnosti u vezi sa proglašenjem Tuzle gradom.

**Elvira Abdić – Jelenović** je postavila tri pitanja.

Prvo pitanje odnosi se na rasterećenje privrednika od plaćanja raznoraznih taksi i naknada, te je konstatovala da je Vlada Federacije uvela i nove naknade poput vodne naknade, koje se obračunavaju na netoplaće radnika.

Upitala je Vladu Federacije kolika je visina prikupljenih sredstava na osnovu naplaćivanja naknade za šume, turizam i vodotoke, na što su ta sredstva utrošena, koliko je sredstava prikupljeno od naknada za gradnju i održavanje atomskih skloništa, te koliko atomskih skloništa ima u Federaciji i koliko ih je izgrađeno od 1995. godine.

Drugo pitanje je postavila Vladi Federacije u vezi sa imenovanjem predsjednika i članova Upravnog odbora "Agrokomerca" d.d. Velika Kladuša.

Treće pitanje se odnosi na odgovor dobijen u vezi sa fazom u kojoj se nalazi žalba dioničara "Hidrogradnje" Sarajevo. Također je postavila pitanje koliko se na domaćim i stranim sudovima vodi postupaka protiv Vlade Federacije radi utvrđivanja vlasničke strukture u preduzećima.

**Denis Zvizdić** je postavio dva pitanja.

Prvo pitanje je uputio Kolegiju Doma naroda u vezi sa neodržavanjem sjednica Doma naroda skoro tri mjeseca.

Predsjedavajući Stjepan Krešić odgovorio je da je Kolegij zasjedao kontinuirano te je zauzeo stav da nije bilo potrebe za sjednicama.

Drugo pitanje je uputio Federalnom ministarstvu turizma i okoliša, u kojoj je fazi stvaranje institucionalnih i finansijskih pretpostavki za puno i aktivno funkcioniranje Fonda za zaštitu okoliša.

**Josip Perić** upitao je šta su sigurnosne službe i Federalno ministarstvo unutrašnjih poslova preduzeli u vezi sa djeljenjem letaka kojima se diskreditirao kandidat Hrvatske stranke prava, za vrijeme općinskih izbora u Tomislav-Gradu i u drugim mjestima gdje su se dešavale slične stvari.

**Kenan Keserović** je postavio pitanje Federalnom ministarstvu obrazovanja i nauke u vezi sa informacijom o broju upisane djece u osnovne i srednje škole na području Federacije u toku 2008./2009. godine i broju djece osnovnog školskog uzrasta koja su dobila poziv a nisu upisala školu u školskoj 2008./2009. godini. Zatražio je da mu se uz pisani odgovor priloži kvantitativni prikaz broja u svih deset kantona Federacije BiH.

**Mira Ljubijankić** je postavila tri pitanja.

Prvo pitanje je vezano uz savjetnika premijera Federacije Mehu Rekića.

Drugo pitanje se odnosi na izvještaj o nacionalnoj zastupljenosti zaposlenih u organima uprave, javnim preduzećima i javnim institucijama.

Treće pitanje se odnosi na povrat nekretnina Srpskoj pravoslavnoj crkvi, tj. koje se nekretnine mogu odmah vratiti, a za koje se mora čekati donošenje Zakona o restituciji.

**Mislav Sučić** je postavio dva pitanja Federalnom ministarstvu prometa i komunikacija.

Prvo pitanje se odnosi na prekategoriizaciju ceste Livno-Prolog-Vaganj-Sinj iz državne ceste u regionalnu cestu.

Drugo pitanje je vezano uz prihode i rashode Direkcije za ceste Federacije BiH i koliko se tih rashoda odnose na Kanton 10.

**Asim Mekić** je zatražio da Federalno ministarstvo za pitanja branitelja i invalida odbrambeno-oslobodilačkog rata donese provedbene akte kojim bi se regulirala nadležnost za izdavanja odgovarajućih dokumenata koji se tiču pripadnosti Oružanim snagama Bosne i Hercegovine.

**Ismet Imamović** je pokrenuo Inicijativu prema Direkciji cesta Federacije BiH da se u Budžetu za 2009. godinu predvide sredstva za izgradnju magistralnog puta M-18-2.

**Besim Spahić** je postavio pitanje Vladi Federacije - kada će Institut za medicinsko vještačenje zdravstvenog stanja početi vršiti medicinsko vještačenje iz oblasti penzijskoga i invalidskog osiguranja.

Premijer Federacije je odgovorio da Institut i Federalni fond za penzijsko osiguranje nisu potpisali ugovor o plaćanju medicinskog vještačenja, te je izjavio da će se nakon imenovanja novog menadžmenta ubrzati rješavanje ovog problema.

**Lidija Bradara** je pokrenula inicijativu za donošenje Zakona o izmjeni i dopuni Zakona o naplati i djelimičnom otpisu dospelih, a nenaplaćenih doprinosa za socijalno osiguranje.

**Sead Čaušević** je postavio pitanje Federalnom ministarstvu prometa i komunikacija, odnosno Direkciji za ceste Federacije BiH u vezi sa

osposobljavanjem raskrsnice na magistralnom putu Doboj –Tuzla na ulazu u Gračanicu.

Premijer je odgovorio da će u skorije vrijeme biti riješen problem ove raskrsnice.

**Zoran Budimić** je postavio dva pitanja.

Prvo pitanje je postavio Federalnom ministarstvu rada i socijalne politike u vezi sa dobijanjem rješenja o penziji za penzionere koji su penzionisani prije rata.

Drugo pitanje je postavio Federalnom ministarstvu zdravstva u vezi sa rasporedom sredstava po kantonima iz Fonda solidarnosti za liječenje oboljelih od multiple skleroze.

**Besim Imamović** je postavio Vladi Federacije dva pitanja.

Prvo pitanje se odnosilo na kašnjenje u dostavljanju akata koji su predviđeni Programom rada Doma naroda Parlamenta Federacije BiH, prvenstveno misleći na Zakon o poticajima u ekologiji.

Drugo pitanje se odnosi na dostavljanje Zakona o izmjenama i dopunama Zakona o šumama i Zakona o poticajima u ekologiji u parlamentarnu proceduru.

Nakon postavljenih delegatskih pitanja i inicijativa prešlo se na utvrđivanje dnevnog reda.

Predsjedavajući je obavijestio delegate da je Vlada Federacije dostavila Prijedlog Zakona o agencijama i unutrašnjim službama za zaštitu ljudi i imovine sa prijedlogom da se razmatra po hitnom postupku. Također, Vlada Federacije je dostavila Prijedlog Zakona o izmjenama i dopunama Zakona o kontroli cijena sa prijedlogom da se razmatra po skraćenom postupku. Naknadno, Federalno ministarstvo trgovine je dostavilo dopis kojim predlaže da se ovaj Prijedlog Zakona razmatra po hitnom postupku, što je Predstavnički dom prihvatio. Komisija za zaštitu ljudskih prava i sloboda Predstavničkog doma je dostavila Prijedlog Zakona o izmjenama i dopunama Zakona o zdravstvenom osiguranju sa prijedlogom da se razmatra po skraćenom postupku, ali je Predstavnički dom odlučio da ga razmatra po hitnom postupku.

Predsjedavajući je dao ove prijedloge na glasanje i konstatovao sljedeće:

- Dom naroda Parlamenta Federacije BiH je, sa 40 glasova za i uz jedan glas protiv, prihvatio da se Prijedlog Zakona o agencijama i unutrašnjim službama za zaštitu ljudi i imovine razmatra po hitnom postupku;
- Dom naroda Parlamenta Federacije BiH je, sa 39 glasova za, uz jedan glas protiv i uz jedan uzdržani glas, prihvatio da se Prijedlog Zakona o izmjenama i dopunama Zakona o kontroli cijena razmatra po hitnom postupku;
- Dom naroda Parlamenta Federacije BiH je, sa 35 glasova za i uz šest uzdržanih glasova, prihvatio da se Prijedlog Zakona o

izmjenama i dopunama Zakona o zdravstvenom osiguranju razmatra po hitnom postupku.

Potom je predsjedavajući dao na glasanje prijedlog Vlade Federacije da se Prijedlog Zakona o izmjenama i dopunama Zakona o lijekovima koji se upotrebljavaju u veterinarstvu razmatra po skraćenom postupku.

Na osnovu rezultata glasanja, predsjedavajući je konstatovao da je Dom naroda Parlamenta Federacije BiH, sa 40 glasova za i uz jedan uzdržani glas, prihvatio da se Prijedlog Zakona o izmjenama i dopunama Zakona o lijekovima koji se upotrebljavaju u veterinarstvu razmatra po skraćenom postupku.

Predsjedavajući je obavijestio delegate da je iz Ureda Visokog predstavnika stigao dopis kojim se traži da se Nacrt Zakona o sukobu interesa u organima vlasti u Federaciji Bosne i Hercegovine razmatra u formi prijedloga Zakona po hitnom postupku. Predsjedavajući je informirao delegate da su klubovi naroda predložili da se sada ovaj Zakon razmatra u formi nacrta Zakona, a da se nakon usvajanja ovog Zakona u Predstavničkom domu, koji je odlučio da ga razmatra u formi prijedloga Zakona po hitnom postupku, Zakon razmotri u formi prijedloga.

Delegati su prihvatili da se Zakon o sukobu interesa u organima vlasti u Federaciji BiH razmatra u formi nacrta.

Potom je predsjedavajući pročitao predloženi dnevni red i na osnovu rezultata glasanja konstatovao da je Dom naroda Parlamenta Federacije jednoglasno, sa 41 glasom, usvojio sljedeći:

### **D N E V N I R E D**

1. Prijedlog Zakona o agencijama i unutrašnjim službama za zaštitu ljudi i imovine – hitni postupak;
2. Prijedlog Zakona o izmjenama i dopunama Zakona o kontroli cijena – hitni postupak;
3. Prijedlog Zakona o izmjenama i dopunama Zakona o zdravstvenom osiguranju (predlagač: Komisija za zaštitu ljudskih prava i sloboda Predstavničkog doma) - hitni postupak;
4. Prijedlog Zakona o izmjenama i dopunama Zakona o lijekovima koji se upotrebljavaju u veterinarstvu - skraćeni postupak;
5. Prijedlog Zakona o izmjenama i dopunama Zakona o prestanku primjene Zakona o napuštenim stanovima (predlagač: Jasmin Duvnjak, zastupnik u Predstavničkom domu);
6. Prijedlog Zakona o izmjenama i dopunama Zakona o policijskim službenicima Federacije BiH;
7. Prijedlog Zakona o finansijskoj konsolidaciji Javnog preduzeća "Željeznice Federacije BiH" d.o.o. Sarajevo za period od 01.01.2008. do 31.12.2012. godine;

8. Nacrt Zakona o sukobu interesa u organima vlasti u Federaciji BiH;
9. Nacrt Zakona o novčanim podrškama u poljoprivredi i ruralnom razvoju;
10. Nacrt Zakona o poljoprivrednom zemljištu;
11. Izvještaj o radu Regulatorne komisije za električnu energiju u Federaciji BiH – FERK;
12. Izvještaj Parlamentarne komisije odgovorne za reviziju o revizijskom izvještaju Zavoda zdravstvenog osiguranja i reosiguranja Federacije BiH za 2006. godinu.

## **1. Prijedlog Zakona o agencijama i unutrašnjim službama za zaštitu ljudi i imovine**

Prijedlog Zakona utvrdila je Vlada Federacije.

Predstavnički dom je na nastavku 14. sjednice od 16. jula 2008. godine usvojio Prijedlog Zakona o agencijama i unutrašnjim službama za zaštitu ljudi i imovine sa osam amandmana koje je Vlada Federacije prihvatila, pa su postali sastavni dio Prijedloga zakona i jednim amandmanom, koji je Predstavnički dom izglasao.

Prijedlog Zakona razmatrala su nadležna radna tijela i dostavila svoje izvještaje.

Na Prijedlog Zakona četiri amandmana podnio je Isak Ramo, koje je naknadno povukao, pa je podnio dva nova amandmana koje je, također, povukao, jer je predstavnik Vlade Federacije izjavio da će sadržaj tih amandmana biti ugrađen u podzakonske akte koji će se donijeti na osnovu ovog Zakona.

Prijedlog Zakona obrazložila je Almedina Fočo, pomoćnica federalnog ministra unutrašnjih poslova.

Ispred Komisije za sigurnost Ramo Isak je predložio da se Zakon usvoji u tekstu kako ga je usvojio Predstavnički dom.

Na osnovu rezultata glasanja, predsjedavajući je konstatovao da je Dom naroda Parlamenta Federacije, sa 36 glasova za i uz jedan uzdržani glas, usvojio Prijedlog Zakona o agencijama i unutrašnjim službama za zaštitu ljudi i imovine u tekstu kako ga je usvojio Predstavnički dom, tj. sa osam amandmana koje je Vlada Federacije prihvatila na sjednici Predstavničkog doma i jednim amandmanom koji je Predstavnički dom izglasao.

## **2. Prijedlog Zakona o izmjenama i dopunama Zakona o kontroli cijena**

Prijedlog Zakona utvrdila je Vlada Federacije.

Predstavnički dom je na nastavku 14. sjednice od 16. jula 2008. godine usvojio Prijedlog Zakona o izmjenama i dopunama Zakona o kontroli cijena sa jednim amandmanom koji je Vlada Federacije prihvatila, pa je postao sastavni dio Prijedloga Zakona.

Prijedlog Zakona razmatrala su nadležna radna tijela i dostavila svoje izvještaje.

Prijedlog Zakona obrazložio je Desnica Radivojević, federalni ministar trgovine.

U pretresu su učestvovali Igor Rajner i Besim Imamović.

Nakon toga predsjedavajući je predložio da se o svim tačkama dnevnog reda obavi pretres, a izjašnjavanje obavi na kraju sjednice, što su delegati prihvatili.

## **3. Prijedlog Zakona o izmjenama i dopunama Zakona o zdravstvenom osiguranju**

Predlagač ovog Zakona je Komisija za zaštitu ljudskih prava i sloboda Predstavničkog doma.

Predstavnički dom je na nastavku 11. sjednice od 27. maja 2008. godine usvojio Prijedlog Zakona sa izmjenama i dopunama Zakona o zdravstvenom osiguranju u tekstu kako ga je predložio predlagač.

Prijedlog Zakona razmatrala su nadležna radna tijela i dostavila svoje izvještaje.

Prijedlog Zakona obrazložila je Mersija Krzić, predsjednica Komisije za zaštitu ljudskih prava i sloboda Predstavničkog doma, koja je skrenula pažnju da u obrazloženju Prijedloga Zakona umjesto riječi «redovan» treba da piše: «redovne i na vanredne studente».

Ispred Odbora za boračka i invalidska pitanja, rad, zdravstvenu i socijalnu zaštitu Fahrudin Skopljak, predsjednik Odbora, predložio je da Dom naroda donese Zaključak koji je pročitao.

Alija Begović, predsjednik Kluba delegata bošnjačkog naroda, izjavio je da će Klub podržati Zakon, kao i Zaključak Odbora, te zatražio da se Dom naroda izjasni o Zaključku.

U pretresu su učestvovali: Muhamed Osmić, Mira Ljubijankić, Zoran Budimić i Tomo Vidović.

#### **4. Prijedlog Zakona o izmjenama i dopunama Zakona o lijekovima koji se upotrebljavaju u veterinarstvu**

Prijedlog Zakona utvrdila je Vlada Federacije.

Predstavnički dom je na nastavku 14. sjednice od 16. jula 2008. godine usvojio Prijedlog Zakona o izmjenama i dopunama Zakona o lijekovima koji se upotrebljavaju u veterinarstvu sa dva amandmana koja je Vlada Federacije prihvatila, pa su postali sastavni dio Prijedloga Zakona.

Prijedlog Zakona razmatrala su nadležna radna tijela i dostavila svoje izvještaje.

Prijedlog Zakona obrazložila je Nada Rajković, pomoćnica federalnog ministra poljoprivrede, vodoprivrede i šumarstva.

Ispred Odbora za poljoprivredu, vodoprivredu i šumarstvo Zoran Budimić, predsjednik Odbora, predložio je da Dom naroda usvoji Zakon po skraćenom postupku.

U pretresu nije niko učestvovao.

#### **5. Prijedlog Zakona o izmjenama i dopunama Zakona o prestanku primjene Zakona o napuštenim stanovima**

Predlagač ovog Zakona je Jasmin Duvnjak, zastupnik u Predstavničkom domu.

Predsjedavajući je podsjetio delegate da je Predstavnički dom na nastavku 11. sjednice od 28. marta 2008. godine usvojio Prijedlog Zakona u tekstu kako ga je predložio predlagač, a koji je dostavio 24. marta 2008. godine.

Dom naroda je na nastavku 12. sjednice od 23. maja 2008. godine odlučio da ovaj Zakon razmatra u formi nacрта i Zaključkom ga prihvatio. Nakon toga, predlagač je 22. jula 2008. godine Domu naroda dostavio novi tekst Prijedloga Zakona.

Prijedlog Zakona razmatrala su nadležna radna tijela i dostavila svoje izvještaje.

Jasmin Duvnjak je predložio da se odgodi pretres o Prijedlogu Zakona kako bi se izvršile dodatne konsultacije sa predstavnicima klubova delegata u Domu naroda, što su delegati prihvatili.



## **6. Prijedlog Zakona o izmjenama i dopunama Zakona o policijskim službenicima Federacije BiH**

Prijedlog Zakona utvrdila je Vlada Federacije.

Predstavnički dom je na 15. sjednici od 22. jula 2008. godine usvojio Prijedlog Zakona o izmjenama i dopunama Zakona o policijskim službenicima Federacije BiH u tekstu kako ga je predložila Vlada Federacije.

Prijedlog Zakona razmatrala su nadležna radna tijela i dostavila svoje izvještaje.

Prijedlog Zakona obrazložila je Medina Kočan, pomoćnica federalnog ministra unutrašnjih poslova.

U pretresu nije niko učestvovao.

## **7. Prijedlog Zakona o finansijskoj konsolidaciji Javnog preduzeća “Željeznice Federacije BiH” d.o.o. Sarajevo za period od 01.01.2008. do 31.12.2012. godine**

Prijedlog Zakona utvrdila je Vlada Federacije.

Predsjedavajući je podsjetio delegate da je Predstavnički dom na 7. sjednici od 20. novembra 2007. godine usvojio Prijedlog Zakona u tekstu kako ga je predložila Vlada Federacije, a koji je dostavila 18. oktobra 2007. godine.

Dom naroda je na 9. sjednici od 27. novembra 2007. godine odlučio da Zakon razmatra u formi nacrtu i Zaključkom ga prihvatio. Nakon toga, Vlada Federacije je 09. januara 2008. godine Domu naroda dostavila novi tekst Prijedloga Zakona.

Prijedlog Zakona razmatrala su nadležna radna tijela i dostavila svoje izvještaje.

Prijedlog zakona je obrazložio premijer Nedžad Branković.

U pretresu su učestvovali premijer Nedžad Branković i Josip Perić, predsjednik Kluba delegata hrvatskog naroda, koji je izjavio da Klub delegata hrvatskog naroda neće podržati Prijedlog Zakona.

## **8. Nacrt Zakona o sukobu interesa u organima vlasti u Federaciji BiH**

Nacrt Zakona utvrdila je Vlada Federacije.

Nacrt Zakona razmatrala su nadležna radna tijela i dostavila svoje izvještaje.

Nacrt Zakona obrazložio je Feliks Vidović, federalni ministar pravde.

U pretresu su učestvovali: Kenan Keserović, Pero Jukić, Igor Rajner, Alija Begović, Ljubo Zovko, Besim Imamović, Zaim Imamović Kaze, Sead Čaušević, Asim Mekić i Feliks Vidović, federalni ministar pravde.

## **9. Nacrt Zakona o novčanim podrškama u poljoprivredi i ruralnom razvoju**

Nacrt Zakona utvrdila je Vlada Federacije.

Nacrt Zakona razmatrala su nadležna radna tijela i dostavila svoje izvještaje.

Predstavnički dom je na 15. sjednici od 22. jula 2008. godine razmatrao Nacrt Zakona i Zaključkom ga prihvatio.

Nacrt Zakona obrazložio je Damir Ljubić, federalni ministar poljoprivrede, vodoprivrede i šumarstva.

Ispred Odbora za poljoprivredu, vodoprivredu i šumarstvo Zoran Budimić, predsjednik Odbora, pročitao je predložene zaključke odbora u vezi sa ovim Zakonom.

U pretresu su učestvovali: Elvira Abdić–Jelenović, Željko Asić, Igor Rajner, Nikola Simić i Mislav Sučić.

\* \* \*

S obzirom na to da je Lidija Bradara obavijestila delegate da je primila informaciju kako se u Vitezu desio teroristički napad u trgovačkom centru FIS, zatražila je da se Domu naroda obrate federalni ministar unutrašnjih poslova, premijer Federacije ili direktor Federalne uprave policije u vezi sa ovim događajem.

Nakon toga je predsjedavajući dao pauzu u trajanju od 30 minuta.

Nakon pauze, Domu naroda se se obratio Samir Džebo, zamjenik direktora Federalne uprave policije.

Nakon obraćanja Samira Džebe, predsjedavajući je u 15 sati i 16 minuta prekinuo sjednicu za taj dan.

## **NASTAVAK SJEDNICE OD 17. OKTOBRA 2008. GODINE**

Sjednica je počela u 10 sati i 16 minuta.

Sjednici je predsjedavao Stjepan Krešić, predsjedavajući Doma naroda Parlamenta Federacije BiH.

Na početku sjednice predsjedavajući je pozdravio: delegate, potpredsjednicu Federacije Spomenku Mičić, ministre u Vladi Federacije

BiH, predstavnike udruženja, međunarodnih organizacija, goste i predstavnike akreditiranih medijskih kuća koji prate rad sjednice.

Izostanak sa sjednice opravdali su Jasenko Tufekčić, Dženana Zlatar, Dragomir Bilić i Vanja Broćeta.

Na osnovu evidencije Stručne službe, predsjedavajući je konstatovao da sjednici prisustvuje 35 delegata, što čini većinu, te Dom naroda može raditi i punovažno odlučivati.

Prije prelaska na rad, predsjedavajući je posjetio delegate na preostale tačke dnevnog reda i nastavio pretres na 9. tački dnevnog reda.

## **9. Nacrt Zakona o novčanim podrškama u poljoprivredi i ruralnom razvoju**

U pretresu su učestvovali Igor Rajner, Damir Ljubić, federalni ministar poljoprivrede, vodoprivrede i šumarstva i Nikola Simić.

Na osnovu rezultata glasanja, predsjedavajući je konstatovao da je Dom naroda Parlamenta Federacije jednoglasno, sa 39 glasova, usvojio sljedeći:

### **ZAKLJUČAK**

1. Dom naroda Parlamenta Federacije BiH prihvata Nacrt Zakona o novčanim podrškama u poljoprivredi i ruralnom razvoju i smatra da može poslužiti kao osnova za izradu prijedloga Zakona.
2. Zadužuje se Vlada Federacije BiH da prilikom izrade prijedloga Zakona ima u vidu primjedbe, prijedloge i sugestije iznesene na sjednici.

## **10. Nacrt Zakona o poljoprivrednom zemljištu**

Nacrt Zakona utvrdila je Vlada Federacije.

Predstavnički dom je na nastavku 14. sjednice od 16. jula 2008. godine razmatrao Nacrt Zakona i Zaključkom ga prihvatio.

Nacrt Zakona razmatrala su nadležna radna tijela i dostavila svoje izvještaje.

Nacrt Zakona obrazložio je Damir Ljubić, federalni ministar poljoprivrede, vodoprivrede i šumarstva.

Ispred Odbora za poljoprivredu, vodoprivredu i šumarstvo Zoran Budimić, predsjednik Odbora, izjavio je kako Odbor predlaže Domu naroda da prihvati Nacrt Zakona.

U pretresu su učestvovali: Svetozar Pudarić, Besim Spahić, Igor Rajner, Nikola Simić, Ljubo Zovko i Muhamed Osmić.

Na osnovu rezultata glasanja, predsjedavajući je konstatovao da je Dom naroda Parlamenta Federacije jednoglasno, sa 45 glasova, usvojio sljedeći:

### **Z A K L J U Č A K**

1. Dom naroda Parlamenta Federacije BiH prihvata Nacrt Zakona o poljoprivrednom zemljištu i smatra da može poslužiti kao osnova za izradu prijedloga Zakona.
2. Zadužuje se Vlada Federacije BiH da prilikom izrade prijedloga Zakona ima u vidu primjedbe, prijedloge i sugestije iznesene na sjednici.

#### **11. Izvještaj o radu Regulatorne komisije za električnu energiju u Federaciji BiH – FERK**

Na osnovu člana 16. Zakona o električnoj energiji u Federaciji BiH, Regulatorna komisija za električnu energiju u Federaciji BiH je dužna podnositi izvještaj Parlamentu Federacije BiH o svom radu najmanje jedanput godišnje.

Predstavnički dom Parlamenta Federacije BiH je na nastavku 14. sjednice od 16. jula 2008. godine prihvatio ovaj Izvještaj.

Izvještaj je obrazložila Đulizara Hadžimustafić, predsjedavajuća Regulatorne komisije za električnu energiju u Federaciji BiH.

U raspravi nije niko učestvovao.

Na osnovu rezultata glasanja, predsjedavajući je konstatovao da je Dom naroda Parlamenta Federacije jednoglasno, sa 44 glasa, prihvatio Izvještaj o radu Regulatorne komisije za električnu energiju u Federaciji BiH – FERK.

#### **12. Izvještaj Parlamentarne komisije odgovorne za reviziju o revizijskom izvještaju Zavoda zdravstvenog osiguranja i reosiguranja Federacije BiH za 2006. godinu**

Ured za reviziju institucija u Federaciji BiH dostavio je Parlamentu Federacije BiH Izvještaj o reviziji finansijskih izvještaja Zavoda zdravstvenog osiguranja i reosiguranja Federacije BiH za 2006. godinu.

Parlamentarna komisija odgovorna za reviziju dostavila je Parlamentu Federacije BiH Izvještaj o revizijskom izvještaju Zavoda zdravstvenog osiguranja i reosiguranja Federacije BiH za 2006. godinu.

Izvještaj Parlamentarne komisije odgovorne za reviziju obrazložila je Lidija Bradara, zamjenica predsjednice Parlamentarne komisije odgovorne za reviziju.

U raspravi su učestvovali Alija Begović i Lidija Bradara.

Na osnovu rezultata glasanja, predsjedavajući je konstatovao da je Dom naroda Parlamenta Federacije BiH, jednoglasno, sa 45 glasova,

prihvatio Izvještaj o reviziji finansijskih izvještaja Zavoda zdravstvenog osiguranja i reosiguranja Federacije BiH za 2006. godinu i Izvještaj Parlamentarne komisije odgovorne za reviziju o revizijskom izvještaju Zavoda zdravstvenog osiguranja i reosiguranja Federacije BiH za 2006.godinu.

Tom prilikom usvojio je i sljedeći:

## **ZAKLJUČAK**

Zadužuje se Vlada Federacije BiH i Federalno ministarstvo zdravstva da do kraja 2008. godine izvrše sve formalno-pravne radnje na organiziranju, odnosno formiranju Fonda zdravstvenog reosiguranja Federacije BiH.

Potom se prešlo na glasanje o tačkama dnevnog reda koje su razmatrane na početku 16. sjednice od 09. oktobra 2008. godine.

### **2. Prijedlog Zakona o izmjenama i dopunama Zakona o kontroli cijena**

Na osnovu rezultata glasanja, predsjedavajući je konstatovao da je Dom naroda Parlamenta Federacije, sa 42 glasa za i uz jedan uzdržani glas, usvojio Prijedlog Zakona o izmjenama i dopunama Zakona o kontroli cijena.

### **3. Prijedlog zakona o izmjenama i dopunama Zakona o zdravstvenom osiguranju**

Predsjedavajući je podsjetio delegate da je predlagač Zakona Komisija za zaštitu ljudskih prava i sloboda Predstavničkog doma.

Na osnovu rezultata glasanja, predsjedavajući je konstatovao da je Dom naroda Parlamenta Federacije, jednoglasno (45 glasova), usvojio Prijedlog Zakona o izmjenama i dopunama Zakona o zdravstvenom osiguranju.

S obzirom na to da je Odbor za boračka i invalidska pitanja, rad, zdravstvenu i socijalnu zaštitu predložio zaključak, predsjedavajući ga je pročitao i, na osnovu rezultata glasanja, konstatovao da je Dom naroda Parlamenta Federacije, jednoglasno (45 glasova), usvojio sljedeći:

## **ZAKLJUČAK**

Zadužuje se Vlada Federacije BiH da prilikom izrade novog teksta Zakona o zdravstvenom osiguranju vodi računa da se novim zakonskim rješenjima stimuliše povratak u Republiku Srpsku.

#### **4. Prijedlog Zakona o izmjenama i dopunama Zakona o lijekovima koji se upotrebljavaju u veterinarstvu**

Na osnovu rezultata glasanja, predsjedavajući je konstatovao da je Dom naroda Parlamenta Federacije, jednoglasno (45 glasova) usvojio Prijedlog Zakona o izmjenama i dopunama Zakona o lijekovima koji se upotrebljavaju u veterinarstvu sa **pravno-tehničkim primjedbama**, koje se odnose na čl. 8., 12. i 19., a koje je Vlada Federacije BiH prihvatila kao amandman i amandman na član 21., te su postali sastavni dio Prijedloga Zakona.

#### **6. Prijedlog Zakona o izmjenama i dopunama Zakona o policijskim službenicima Federacije BiH**

Na osnovu rezultata glasanja, predsjedavajući je konstatovao da je Dom naroda Parlamenta Federacije, sa 40 glasova za i uz pet uzdržanih glasova, usvojio Prijedlog Zakona o izmjenama i dopunama Zakona o policijskim službenicima Federacije BiH.

#### **7. Prijedlog Zakona o finansijskoj konsolidaciji Javnog preduzeća “Željeznice Federacije BiH” d.o.o. Sarajevo za period od 01.01.2008. do 31.12.2012. godine**

Predsjedavajući je obavijestio delegate da je predlagač Zakona predložio da se odgodi izjašnjenje o Prijedlogu Zakona, što su delegati prihvatili.

#### **8. Nacrt Zakona o sukobu interesa u organima vlasti u Federaciji BiH**

Na osnovu rezultata glasanja, predsjedavajući je konstatovao da je Dom naroda Parlamenta Federacije, sa 32 glasa za, uz jedan glas protiv i uz 11 uzdržanih glasova, usvojio sljedeći:

### **ZAKLJUČAK**

1. Dom naroda Parlamenta Federacije BiH prihvata Nacrt Zakona o sukobu interesa u organima vlasti u Federaciji BiH i smatra da može poslužiti kao osnova za izradu prijedloga Zakona.

2. Zadužuje se Vlada Federacije BiH da prilikom izrade prijedloga Zakona ima u vidu prijedloge, primjedbe i sugestije iznesene na sjednici.

\* \* \*

Sjednica je završena u 12.13.

Transkript sjednice čini sastavni dio Zapisnika.

SEKRETAR

Izmir Hadživdić

PREDSJEDAVAJUĆI

Stjepan Krešić